

古逸丛书

市上造古

古逸叢書

光緒十年甲申
遵義黎氏刊于
日本東京使署

重修古逸叢書敘

遵義黎莚齋先生光緒初奉使日本治事之暇蒐訪古書所得各本世多未見遂次第刊行經始於壬午告成於甲申凡二十六種都二百卷以中多古本逸編命曰古逸叢書其自序有云古書之流遺何幸復見於異邦而自余得之且以付刊天假此使事歲月從事讀書不可謂非厚幸書成將敘其板運致之官局以與學者共之大哉斯言不藏之名山而公之天下此不獨嘉惠一時後世學子皆

當鑒其耆古之誠而誦其愛士之摯非豪傑
不能有是舉也張文襄公嘗謂有力好事之
人刊播古書如歙鮑氏吳黃氏南海伍氏金
山錢氏五百年中必不泯滅此特書生好名
之見耳自先生觀之豈值一喙哉先生鑒別
最精茲編經則覆元至正本易程傳繫辭精
義影宋紹熙本穀梁傳覆正平本論語集解
覆舊鈔卷子本唐開元御注孝經影宋蜀大
字本爾雅皆不可不讀之書子則集唐字道
德經注摹張參五經文字唐玄度九經字樣

為之影宋台州本荀子錢遵王稱為字大說
目南宋本莊子注疏僅存十之五用西法影
照上木其闕者取坊刻成玄英疏本校定繕
補而別集它卷字當之不足則命工仿寫先
生自言極鉤心鬪角之苦非虛語也影紹熙
本穀梁傳覆宋本重修廣韻皆有校勘札記
讀者稱便其它各書大都海外孤本非中土
所有天下之環寶也自先生使節還朝其
版藏蘇州書局印行既久字多剝蝕杜工部
草堂詩箋前四十一卷為宋麻沙本尤多漫

漣不可辨識今年孟夏召漣上良工用圖書
館初印本覆刊最影宋台州本荀子刊補一
葉影宋本莊子注疏刊補七葉影宋蜀大字
本尚書釋音刊補三葉影舊鈔孝子原本玉
篇零本刊補四葉覆麻沙本草堂詩箋刊補
八十九葉閱半載工始竣精本古籍遂得完
善既以饜學者之意亦庶幾不負先生之盛
誼也夫辛酉九月吳縣曹允源

刻古逸叢書序

予使日本之明年得古書若干種謀次第播
行屬楊君星吾任校刻惟夫古籍之僅存與
焚齋蠹之無常其勢不日趨散亡不止學士
大夫雖病之而無術以免惟好之而即求求之
而即傳差足救散於後予非苟為其難也古
書之流遺何幸復見於異邦而自予得之且
以付刊焉予亦不自知所以然庸詎知非天之
有意斯文而啟予贊其始也予患不學久矣
今天假此使事歲月俾得從事讀書不可謂

非厚幸子曰好古敏以求之請自茲始書成將斂其版運致之官局以與學者共之雖然卷帙之重而課成於再暮校讐之繁而委積於一人或不免抵牾滋多而謏陋如予又不能精勘其誤失使讀者快焉其力僅足存此書而已古書之不亡古人之精神自寄之豈予所能增重而獨至蒐輯之責似若有默以畀予者固不敢不勉也書凡二百卷二十六種刻隨所獲概還其真無復倫次經始於壬午告成於甲申以其多古本逸編遂命之曰古逸叢

書而別條敘目如左光緒十年歲在甲申七月
遵義黎庶昌序

敘目

影宋蜀大字本爾雅三卷

此書末有將仕郎守國子四門博士臣李
鶚書一行為蜀本真面目最可貴宋諱闕
慎字其為孝宗後繕刻無疑日本再繕之
今又從再繕本影雕展轉撫摹僅存郭廓
而已按後唐平蜀明宗命太學博士李鶚
書五經刊板國子監中見王明清揮麈餘

錄爾雅在五經外豈明清家有五經僅舉
見本而言與鐫鶚不同據此可以訂誤

影宋紹熙本穀梁傳十二卷

此與揚州汪氏問禮堂緒刻公羊傳同為
建安余氏家塾本二書均題紹熙辛亥孟
冬朔日建安余仁仲敬書而此本第十二
卷末有國學進士余仁仲校正國學進士
劉子庚同校國學進士陳幾同校國學進
士張甫同校奉議郎簽書武安軍節度
判官廳公事陳應行參校五銜余氏萬卷

堂藏書記又題癸丑仲秋重校訖則穀梁
之成當浚公年二歲矣此次櫟刻俱精有
取藍勝藍之妙附校札

覆正平本論語集解十卷

此書根源隋唐舊鈔字句與今行本異
同甚夥往往合於陸氏釋文字畫亦奇古
卷末題堯浦道祐居士重新命工鏤梓
正平甲辰五月吉日謹誌正平甲辰當元
順帝至正二十四年其云重新鏤梓則以
前有刻本可知然時代無攷矣道祐錢遵

王讀書敏求記及日本別刻題學古神德
楷法日下逸人貫書者均作道祐予謂當
從此本作祐是又有津藩有造館本論
語集解亦出舊鈔異同處尤為近古皆卷
子真面目也天保中有縮刻本

覆元至正本易程傳六卷繫辭精義二卷

程子易傳東都事略直齋書錄解題載
六卷者是為原本錢遵王猶及見之後世
通行本併作四卷大失程氏舊第近金
陵局刻依董氏真卿周易會通區作六

卷實則未見原書此本雖元時坊刻然宋
諱如貞恒桓慎敦等字多缺筆則元
繡宋板也所有異同即附於逐行字句下
是東萊呂氏參定之遺尤為難得原書
無呂跋今從會通中錄出補刊於後繫
辭精義二卷董真卿云東萊集周子二
程子張子諸家經說語錄及二程子門人
共十五家之說以補之然則館閣書目以為
託名者誤也惟卷首諸圖為坊賈增入
覆舊鈔卷子本唐開元御注孝經一卷

孝經註疏序云明皇於先儒註中採摭菁
英芟去煩亂撮其義理允當者用為註
解至天寶二年註成頒行天下仍自八分
御札勒於石碑即今京兆石臺孝經是
也自石臺行而世幾不知有開元十年之註
其實石臺即用開元本略加脩改而已此
本元行沖序完然獨存惜未錄疏然於
三才章格外注云疏中廣要道章注云疏
下猶可見元氏分卷之遺經義攷引崇
文總目云孝經正義三卷邢昺撰初世

傳元行沖疏外餘家尚多皆猥俗褊陋不
是行遠咸平中吳等奉詔據元氏本而增
損焉與文獻通考所引朱白集諸儒之說
異陳詩庭云叔明僅據行沖疏為本未嘗
參採諸儒故今本猶止題邢昺校當以朱
錫望所引為正

集唐字老子注二卷

日本有摹刻張參五經文字唐玄度九經
字樣甚精與石本無異又有南總地名宇惠
攷訂晁以道本王輔嗣老子道德經注今